

1 Definishon So Tin!

Ora Dios a krea hende, El a krea e hòmbèr promé. Ma E tabata sa ku Adam lo mester tin un kompañé. Beibel ta duna impreshon ku Adam no tabata konsiente di su soledat. Talbes pa konsientis'é, Dios a dun'é un tarea: duná nòmber na tur bestia.

Adam a nota ku tin dos sekso di kada bestia. Ma ni un bestia a yena su mester pa kompañerismo. Siendo e úniko ser sin kompañé el a sintié so.

Mientras Adam a drumi, **Dios a krea un ser spesial pa komplementá e hòmbèr: hende muhé.** Ora el a spièrta, ata un ser ku ta harmonisá ku n'é den tur sintido. E tabata ekstátiko: “*Esaki ta awor wesu di mi wesunan, i karni di mi karni...*”!

Dios a inventá matrimonio, e relashon inter-personal mas presioso i mas íntimo ku hende konosé. **Tur kultura i tur pais ta rekonosé ku 1 hòmbèr i 1 muhé ta forma matrimonio.** Durante e miles di aña di historia humano, hende no por a mehorá Dios Su invenshon.

Ma awendia “ingenieronan sosial” ke sa ku nan ta mas sabí ku Dios! Desfrasá komo amigunan di famia, nan ta buska manera pa destruí Dios Su invenshon.

Si nan haña nan gana, nan lo ekspandé e definishon di matrimonio pa inkluí otro “alternativa”, pa dos hende di e mésun sekso legalmente por gosa e benefisionan di matrimonio. Pues, dos muhé por kasa, kubri gastunan médiko di nan partner na SVB, kobra penshon di biuda si un muri, adoptá yunan, haña redukshon na belasting, èts.

Ma Dios no a krea Adam i Ivan, ni tampoko Ada pa Eva. El a krea matrimonio ku dos sekso distinto, 1 hòmbèr i 1 muhé. “*..un hòmbèr lo bandoná su tata i su mama i lo uni ku su esposa. I nan lo bira ún karni*” (Génesis 2:24). I Beibel ta kondená kategórikamente tur akto homoseksual: “*No drumi ku hòmbèr manera ta drumi ku muhé; ta un abominashon. Si un hòmbèr drumi ku un hòmbèr, manera esnan ku ta drumi ku un muhé, nan tur dos a kometé un akto abominabel...*” (Levítiko 18:22; 20:13).

Pa ampliá e definishon di matrimonio pa inkluí otro “alternativa”, no solamente ta kontradisí Dios Su plan. **E ta totalmente ridíkulo!**

Awa ta konsistí di 2 atom di hidrógeno i 1 atom di oksígeno. Si bo kambia e komposishon ei, e no ta awa mas. Ta méskos ku matrimonio. **Matrimonio = 1 hòmbèr + 1 muhé. Si bo kambia e komposishon ei, e no ta matrimonio mas.**

Bo por bisa ku 6 atom di hidrógeno i 1 atom di oksígeno ta forma awa òf kisas ta 1 atom i 9 atom. Ma e echu no ta kambia: awa ta keda 2 atom di hidrógeno i 1 atom di oksígeno.

Kualke ken ku ta por kontradisí e definishon di matrimonio bisando ku 2 hòmbèr por forma matrimonio. **Ma ekspresando—òf asta legalisando—e opinion ei no ta kambia e echu!** Matrimonio ta keda 1 hòmbèr + 1 muhé! (Nos por hasié legal pa yama 2 atom di oksígeno “awa”. Ma e no ta kambia e echu!)

Si nos aseptá pa kambia un parti di e definishon di matrimonio (género), ta lógiko pa kuestioná otro parti di e definishon di matrimonio tambe! Pakiko limitá matrimonio na dos persona? Matrimonio moderno no por konsistí di 1 hòmbèr + 3 muhé òf kisas 1 muhé + 2 hòmbèr?

I pakiko limitá matrimonio na hende? Si mi ta stima mi kachó, pakiko mi no por kasa kun'é i kobra penshon di biuda ora e muri? Of kisas mi ta preferá kasa ku mi televishon!

Klaramente, si nos ta bandoná e úniko definishon korekto di matrimonio, nos ta habri porta pa tur klase di opinion ridíkulo!

Matrimonio ta bou di atake. Su enemigunan ta studiando kon nan por destruí e relashon inter-personal mas sagrado konosí pa hende. Nos mester pone pia abou i para riba ku tin 1 definishon so di matrimonio: **Dios** Su definishon!